

VENDIM
Nr. 167, datë 15.6.2026

**MBI FILLIMIN E PROCEDURËS PËR SHQYRTIMIN E KËRKESËS SË
SHOQËRISË “DOMA GROUP” SHPK, PËR LICENCIM NË VEPRIMTARINË E
PRODHIMIT TË ENERGJISË ELEKTRIKE**

Në mbështetje të neneve 16 dhe 37, pika 2, germa “a”, të ligjit nr. 43/2015, “Për sektorin e energjisë elektrike”, të ndryshuar; të neneve 4, pika 1, germa “a”, 5, pika 1, germa “a” dhe 10, pikat 1 dhe 3, të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, të miratuar me vendimin e Bordit të Entit Rregullator të Energjisë (ERE) nr. 109, datë 29.6.2016, të ndryshuar; si dhe të neneve 15 dhe 19, pika 1, germa “a”, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 15.6.2026, mbasi shqyrtoi relacionin me nr. 1721/1 prot., datë 10.6.2026, të përgatitur nga Drejtoria e Licencimit, Autorizimeve dhe Garancisë së Origjinës “Mbi kërkesën e shoqërisë ‘Doma Group’ sh.p.k. për licencim në veprimtarinë e prodhimit të energjisë elektrike”,

konstatoi se:

- Shoqëria “Doma Group” sh.p.k., me shkresën e protokolluar në ERE me nr. 1721 prot., datë 1.6.2026, ka paraqitur kërkesën për licencim në veprimtarinë e prodhimit të energjisë elektrike nga hidrocentrali “Vinjoli 1”, me kapacitet të instaluar 1.840 mw, me vendndodhje në përrrenjtë e Varroshit, Manadresë dhe Lajthit, degë e përroit të Zallit të Madh, Bashkia Mat, qarku Dibër.

- Nga shqyrtimi i aplikimit, në referencë të përcaktimeve të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, të ndryshuar, rezulton se:

Përputhshmëria e aplikimit me rregulloren

- Në përputhje me nenin 9, pika 1 dhe 1.1 të rregullores, aplikuesi ka dorëzuar dokumentacionin e kërkuar për pajisjen me licencë sipas germave “a”, “b” dhe “c”, duke plotësuar formularin sipas formatit të përcaktuar në shtojcën 1.

- Në përputhje me nenin 9, pika 1.2 të rregullores, aplikuesi ka dorëzuar dokumentacionin juridik dhe administrativ të kërkuar sipas germave “a”, “b”, “c” dhe “d”.

- Në përputhje me nenin 9, pika 1.3 të rregullores, aplikuesi ka dorëzuar dokumentacionin financiar dhe fiskal të kërkuar sipas germës “c”.

- Në përputhje me nenin 9, pika 2 të rregullores, aplikuesi ka dorëzuar dokumentacionin specifik për licencimin në sektorin e prodhimit të energjisë elektrike sipas germave “b”, “c”, “d” dhe “e”.

Pajisja e shoqërisë me leje dhe miratime të tjera

Rezulton se shoqëria “Doma Group” sh.p.k.:

- Ka nënshkruar me Ministrinë e Infrastrukturës dhe Energjisë, kontratën nr. 641 rep., nr. 186/2 kol., datë 27.12.2018, “Për ndërtimin, shfrytëzimin dhe administrimin e hidrocentralit ‘Vinjoll 1’ me kapacitet prodhues 1.840 mw, në përrrenjtë e Varroshit, Manadresë dhe Lajthit, degë të përroit Zall i madh, Bashkia Mat, qarku Dibër”;

- Është pajisur me miratimin e pikës së lidhjes së HEC “Vinjolli 1” me rrjetin e shpërndarjes nëpërmjet shkresës së OSHEE sh.a. nr. 14690/3 prot., datë 25.7.2018, për kapacitetin 1860 kw. Shoqëria është e detyruar që të operojë brenda kapacitetit 1.840 mw të miratuar nga MIE;

- Është pajisur me lejen për përdorim burimi ujqor sipërfaqësor nr. 39 prot., datë 26.12.2023, me nr. serial 000106, të lëshuar nga Këshilli i Basenit Ujqor (KBU) Mat, me afat vlefshmërie deri më 26.12.2028;

- Është pajisur me vendim për VNM paraprake nr. AN230520230011, lëshuar më 21.9.2023, Komisioni 96, të lëshuar nga Agjencia Kombëtare e Mjedisit (AKM), për zhvillimin e projektit “Ndërtim HEC ‘Vinjolli 1’”, me kapaciteti të instaluar 1.840 mw përfshirë edhe lejen e ndërtimit për objektin “Ndërtimi i hidrocentralit ‘Vinjolli 1’”.

Në kuptim të nenit 9 pikat 1. 3 germat “a”, dhe “b”, si dhe pika 2.1”, germat: “a”, “b”, “d”, dhe “e”, për qëllime të këtij aplikimi shoqëria duhet të plotësojë dhe sa vijon:

Neni 9

1.3. Dokumentacioni financiar dhe fiskal:

- germa “a”:

- vërtetimin të përditësuar për shlyerjen e detyrimeve tatimore;

- vërtetimin për shlyerjen e detyrimeve ndaj organeve të sigurimeve shoqërore dhe shëndetësore (që nuk rezulton të jetë depozituar në këtë aplikim);

- germa “b”: Në referencë të përcaktimeve të nenit 8, pika 2 të kontratës, duhet të depozitojë në ERE miratimin përkatës të MIE-s për ndryshimin e vlerës së investimit. Po ashtu, duhet të depozitojë dokumentacion që vërteton aftësinë financiare të saj për realizimin e projektit.

2.1 Për t’u pajisur me licencë për prodhimin e energjisë elektrike, aplikuesi duhet të depozitojë, gjithashtu:

- germa “a”: Shoqëria duhet të paraqesë të dhënat, në lidhje me vitin e ndërtimit të centralit, datën në të cilën parashikon të fillojë operimin e centralit dhe jetëgjatësinë e pritshme të centralit;

- germa “b”: Shoqëria duhet të depozitojë raportimet e dërguara në MIE, në kuadër të ecurisë së projektit, si dhe të përditësojë çdo informacion/dokumentacion vijues në lidhje me zhvillimin e tij;

- germa “d” Shoqëria duhet të depozitojë vendimin e KBU-së Mat dhe lejen për përdorimin e burimit ujqor në format origjinal ose fotokopje e njësuar me origjinalin;

- germa “e”: Shoqëria duhet të japë informacion, në lidhje me fillimin e punimeve për ndërtimin e centralit.

Për gjithë sa më sipër, Bordi i ERE-s

VENDOSI:

1. Të fillojë procedurën për licencimin e shoqërisë “Doma Group” sh.p.k. në veprimtarinë e prodhimit të energjisë elektrike nga hidrocentrali “Vinjolli 1”, me kapacitet të instaluar 1.840 mw, me vendndodhje në përrrenjtë e Varroshit, Manadresë dhe Lajthit, degë e përroit të Zallit të Madh, Bashkia Mat, qarku Dibër, për një afat 30-vjeçar.

2. Drejtoria e Licencimit, Autorizimeve dhe Garancisë së Origjinës të njoftojë shoqërinë “Doma Group” sh.p.k. dhe Ministrinë e Infrastrukturës dhe Energjisë për vendimin e Bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni të vendimit, rishikimin e vendimit të Bordit në rast se ka siguruar prova

të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti